

Tuttut piniagaanerat pillugu Namminersornerullutik Oqartussat nalunaarutaat

Piniarneq aallaaniarnerlu pillugit Inatsisartut inatsisaanni nr. 12-imi, 29. oktober 1999-imeersumi § 2, imm. 3-4, § 4, §§ 7-8, §§ 12-13, § 16, § 17, imm. 2 aamma § 18 naapertorlugit aalajangersarneqarput:

Atuuffia

§ 1. Una nalunaarut atuuppoq tuttu (Rangifer tarandus) Kalaallit Nunaanni killilersukkanik piniarneqarnerannut sumiiffinnili tuttuuteqarfissanngortitani atuunnani.

Imm. 2. Eqqisisimatitsineq, pisassiissutit aalajangerneqarnerat, nunat piniarfiussat piffissat piniarfiussat piniariaatsinullu tunngasut Namminersornerullutik Oqartussat tuttu eqqisisimatitaanerat pillugu nalunaarutaanni aalajangersakkat malillugit pissapput.

Imm. 3. Inuussutissarsiornermut Naalakkersuisup imm. 2-mi nunat piniarfiussat piffissallu piniarfiussat aalajangerneqartut agguataaqqissinnaavai. Nunat piniarfiussat piffissallu piniarfiussat agguataaqqinneqarnerat pisinnaavoq Piniarneq Pillugu Siunnersuisoqatigiit aamma allat attuumassuteqartut isumasioreerlugit.

Pisassiissutinik agguassineq

§ 2. Inuussutissarsiornermut naalakkersuisoq Piniarneq Pillugu Siunnersuisoqatigiit inassuteqarneratigut Kalaallit Nunaata Kitaanut tuttuassatut pisassiissutit kommuninut sumiiffinnullu aamma kommunit aggornerisa avataanniittunut agguaatissavai.

Imm. 2. Qaanaami kommunalbestyrelsip inassuteqarneratigut pisassiissutigineqartut Qaanaap kommuniani inuussutissarsiutigalugu aamma sunngiffimmi piniartunut Inuussutissarsiornermut Pisortaqarfup agguaatissavai.

Imm. 3. Ukiumut pisassiissutit piumasaqaatillu taakkununga tunngasut tusagassiuutitigut nunamut tamarmut annguttartutigut avammut tusarliunneqassapput tuttuarnissaq sioqqullugu.

Akuersissutinik tunniussineq

§ 3. § 2, imm. 1 malillugu kommunimut pisassiissutinik kommunalbestyrelsi qinnuteqartunut atuuttumik piniarnermut allagartalinnut kommunimi pineqartumi najugalittut nalunaarneqarsimasunut tuttuinnaanermut akuersissutinik tunniussissaaq.

Imm. 2. Sumiiffinni kommunit aggornerisa avataanniittuni qinnuteqartunut atuuttumik piniarnermut allagartalinnut tassanilu najugalittut nalunaarneqarsimasunut tuttuinnaanermut akuersissutinik najukkami borgerrådi tunniussissaaq, takuuk § 2, imm. 1.

§ 4. Kommunimi inuussutissarsiutigalugu piniarnermut allagartalinnot qinnuteqartunut akuersissutinik tunniussinermi sapinngisamik qinnuteqartut akuersissutinik amerlaqatigiinnik pissarsinissaat anguniarneqartassaaq. Tamanna pisinnaangippat akuersissutinik sinneruttunik agguaaneq makitsinikkut ingerlanneqassaaq.

Imm. 2. Sunngiffimmi piniarnermut allagartalinnot qinnuteqartunut akuersissutinik agguaassineq makitsinikkut pissaaq.

Imm. 3. Makitsinermut atatillugu akuersissutinik agguaassisussaataasup utaqqisut allattorsimaffiat tulleriarinertalik pilersissavaa, taannalu atuutilissaaq akuersissutinik agguaasseqqinnermi, takuuk § 5, imm. 2.

Imm. 4. Makitsineq ingerlanneqassaaq najukkami innuttaasunit kikkulluunniit malinnaavigineqarsinnaasumik.

§ 5. Akuersissutinik agguaassisussaataasup akuersissutit tunniunneqartut kingusinnerpaamik qaqugu aaneqareersimanissaat killilissavaa. Inuit akuersissummik tunineqarsimasut akuersissummilli atuisinnaangitsut imaluunniit atuerusunngitsut piaarnerpaamik akuersissut atorineqanngitsoq akuersissutinik agguaassisussaataasumut utertissavaat.

Imm. 2. Akuersissutit atorineqanngitsoortut agguateqqinneqassapput. Agguaasseqqinnerli piaarnerpaamik aatsaat pisinnaavoq sap. ak. marlunnik tuttunniarnerup uninnissaa sioqqullugu akuersissutinik pinissamik utaqqisut tulleriarakkat allattorsimanagerat malillugu.

Piniarnissamut piumasaqaatit

§ 6. § 3 malillugu akuersissutinik inuit pisimasut kisimik tuttussinnaatitaapput.

Imm. 2. Akuersissut inummut atiatigut taasamut taamaallaat atuuppoq allanullu tunniunneqaraniluunniit tunineqarsinnaanani.

Imm. 3. Akuersissut ataaseq ataatsimik tuttunnissamut periarfissiivoq.

§ 7. Inuussutissarsiutigalugu tuttunniarnermut akuersissummi allanneqarsinnaavoq tuttumik ilivitsumik, ilaanik, amianik, nassuinik il.il. tunisisoqarsinnaasoq uumasut nakorsa qarfianiit akuerineqarsimasumut neqileriffimmut imaluunniit tunitsivimmut.

§ 8. Aasaanerani ukiaanerani piniarnissamut akuersissutinik agguanneqarnerannut peqataasinnaassagunik qinnuteqaateqartut allagartaq ukiumi pineqartumi kingusinnerpaamik majip aallaqqaataani akilereersimassavaat.

Imm. 2. Piumasaqaataavortaaq sunngiffimmi piniarnermut allagartalik akuersissummik qinnuteqartoq qinnuteqarnermini 16-inik ukioqalereersimassasoq.

Kommunit ileqqoreqqusat

§ 9. Kommunalbestyrelsi nalunaarummi §§ 7-8-mut piumasaqaatinit sakkortunerusunik kommunip ileqqoreqqusaatigut piumasaqaateqarsinnaavoq. Kommunip ileqqoreqqusiaa Naalakkersuisunut ilaasortamit atortussanngortinneqassaaq.

Nakkutilliineq

§ 10. Inuit § 3 malillugu tuttunniarnissamut akuerineqarsimasut, akuersissummut ilanngullugit tuttumut ataatsimut ikkutassanik ataasiarlugit atugassanik marlunnik, assigiinnik normulikkanik, tunineqassapput kingusinnerusuklut tuttutamut uppernarsaatitut atugassanik.

Imm. 2. Tuttup pisarineqarnerata kinguinnguagut, kingusinnerpaamillu tuttu angallammut assartuussutissamut ikineqarpat, ataasiaannarlugit atugassat taakku quttoraanut qajannaatsumik erseqqissunngorlugillu ikkunneqassapput.

Imm. 3. Ataasiaannarlugit atugassat taakku tuttumi ikkusimaannassapput tunineqarnissaata atorneqarnissaataluunnit tungaanut.

Imm. 4. Ataasiaannarlugit atugassat taakku tunniunneqartut atorneqanngitsoortulli piaarnerpaamik, kingusinnerpaamillu sap. ak. 3-t tuttuniarnerup uninnerata kingorna kommunimut utertinneqassapput. Taava kommunip piaarnerpaamik kingusinnerpaamilli sap. ak. 5-t tuttuniarnerup uninnerata kingorna ataasiaannarlugit atugassat atorneqanngitsoortut Inuussutissarsionermut Pisorta qarfimmu nassiutissavai.

Imm. 5. Tuttutat tamarmik Piniarneq-mi pisanik nalunaarsuiffik atorlugu nalunaarutigineqassapput.

§ 11. Kinaluunniit politiinit, piniarnermik aalisarnermillu nakkutilliisunit allanilluunniit Inuussutissarsionermut Pisorta qarfimmu taamaaliornissamut immikkut pisussaaffilerneqarsimasunit piunaffigineqaruni tuttuniarinnaatitaanini uppernarsaqqullugu, taava piniarnermut allagartaq atuuttoq, tuttuniarinnissamut akuersissut tuttutamullu ataasiaannarlugit ikkutassat takutissinnaassavai.

Pineqaatissiissutit

§ 12. §§ 6-7, § 10, imm. 2-5 aamma § 11-mik unioqutitsinerit akiliisitsinermik pineqaatissiissutaasinnaapput.

Imm. 2. Neqi, ameq allallu tuttumeersut § 6, imm. 1 unioqutillugu tuttutameersut arsaarinnissutigineqarsinnaapput Naalagaaffiup karsianut iluaqutissanngorlugit.

Imm. 3. § 7 malillugu kommunip ileqqoreqqusani kommunalbestyrelsi aalajangiisinnavaoq maleruagassiamik unioqutitsineq akiliisitsinermik kinguneqarsinnaasoq.

Atulersitsineq il.il.

§ 13. Nalunaarut una atuutilerpoq 15. februar 2001.

Imm. 2. Peqatigitillugu Namminersorerullutik Oqartussat tuttu eqqissisimatitaanerat piniagaanerallu pillugu nalunaarutaat nr. 10, 26. Juni 1999-imeersoq atorunnaarpoq.

Namminersorerullutik Oqartussat, ulloq 8. februar 2001.

Simon Olsen

/

Jørn Birk Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut